



Anwar menyaksikan pertukaran memorandum antara Bakri (tiga dari kiri) dengan Presiden Persatuan Pengamal Insolvensi Malaysia, Datuk Raveendra Kumar Nathan pada Majlis Perasmian Sambutan 100 Tahun Jabatan Insolvensi Malaysia di Putrajaya, semalam. (Foto BERNAMA)

142,510 individu bebas bankrap

PM sifatkan Jabatan Insolvensi Malaysia berjaya lewati sasaran belanah nasib rakyat muflis

Oleh Mohd Nasaruddin Parzi
bhnews@bh.com.my

Putrajaya: Seramai 142,510 individu berjaya dilepaskan daripada masalah bankrap sekali gus melepasi sasaran ditetapkan sebelum ini, kata Datuk Seri Anwar Ibrahim.

Perdana Menteri berkata, ini satu pencapaian baik oleh Jabatan Insolvensi Malaysia dalam memberi peluang kedua kepada kelompok terjejas ini untuk meneruskan kehidupan dan memulihkan semula perniagaan.

"Daripada lebih 142,500 individu, syarikat dan keluarga yang terapung (nasibnya), tanpa jelas masa depan dan kehidupan mereka, itu bermakna mereka boleh kembali membantu memacu ekonomi.

"Saya tegaskan dalam sejarah sejak merdeka sampai sekarang belum pernah mana-mana kerajaan yang boleh melepaskan seramai ini," katanya ketika berucap merasmikan Sambutan 100 tahun Jabatan Insolvensi Malaysia, di sini semalam.

Turut sama hadir, Menteri di Jabatan Perdana Menteri (Undang-Undang dan Reformasi Institusi), Datuk Seri Azalina Othman Said dan Timbalannya, M Kulasegaran; Peguam Negara, Datuk Ahmad Terrirudin Mohd Salleh serta Ketua Pengarah In-

solvensi, Bakri Abd Majid.

Mengulas lanjut, Anwar berkata, individu yang dilepaskan itu tidak dibiarkan begitu saja, sebaliknya terus dibantu dan dibimbing bagi mengelak mereka kembali mengulangi kesilapan lampau.

"Kalau lepas saja tidak ada program susulan, dia mungkin terhambat. Sebab itu ada Dasar Peluang Kedua supaya ada langkah susulan yang diketahui (mereka yang dilepaskan).

"Pertama, jangan ulangi kesilapan. Kedua, memahami peluang yang disediakan kerajaan contohnya (pembiayaan dari) Tekun Nasional, MARA (Majlis Amanah Rakyat), PUNB (Perbadanan Usahawan Nasional Berhad). Kadang-kadang peluang sudah diberikan tapi tak dapat dokongan atau sambutan," katanya.

Dasar Peluang Kedua menyasarkan pelepasan sehingga 130,000 orang bankrap bagi tempoh setahun berikutan Akta Insolvensi (Pindaan) 2023 dikuat kuasa bermula Oktober tahun lalu.

Ini satu inisiatif kerajaan untuk membela nasib rakyat yang bankrap dengan jumlah hutang berskala kecil dengan melepaskan mereka daripada kebangkrutan melalui syarat-syarat tertentu, bermula 1 Mac 2023.

Anwar ketika membentangkan Belanjawan 2024 tahun lalu juga berkata, dasar ini akan diperluas kepada golongan muda berusia 40 tahun dan ke bawah yang mempunyai hutang tidak melebihi RM200,000 bermula tahun ini.

Selain peluang kedua itu, Anwar berkata, kumpulan ini juga layak mendapat Sumbangan Tunai Rahmah (STR) kerajaan.

"Sementara mereka boleh bernafas, kita ada suntikan Tunai

Rahmah. Berapa jumlahnya? RM10 bilion setahun, hanya 'cash transfer' (pindahan tunai) kepada rakyat terutama M40 dan B40 yang berjumlah sembilan juta rakyat," katanya.

Individu yang layak dipertimbang di bawah Dasar Peluang Kedua ialah pengisytiharaan bankrap mereka sudah melepasi tempoh lima tahun dari tarikh Perintah Penerimaan dan Perintah Penghukuman atau Perintah Kebankrapan.

Selain itu, jumlah hutang yang diperaku atau jumlah baki hutang yang terlibat tidak melebihi RM50,000.

Individu bankrap yang melepasi syarat asas di atas, mereka boleh hadir secara fizikal atau berhubung melalui surat, e-mel atau mengisi borang Permohonan Pelepasan Sijil Ketua Pengarah Insolvensi Di Bawah Seksyen 33A Akta Insolvensi 1967 yang boleh didapati di laman sesawang <https://www.mdi.gov.my> dan diserahkan ke cawangan yang mentadbir kes bankrap.

Kemudian, pegawai Insolvensi akan menyemak permohonan bankrap, kedudukan dokumen pentadbiran dan maklumat yang berkaitan dengan pentadbiran kebangkrutan dan individu bankrap hendaklah memberikan kerjasama dengan memberikan maklumat dan dokumen yang diperlukan oleh Pegawai Insolvensi.

Pegawai Insolvensi kemudian akan menyemak kedudukan kes dan memastikan dokumen dan perkara yang berkaitan dengan pentadbiran bankrap sudah lengkap dan teratur serta seterusnya Ketua Pengarah Insolvensi akan mengeluarkan notis niat untuk pelepasan bankrap kepada pemiutang.